

801
326

瓊芳靜齋

國

學

藝

編

第四期
寶盃署

呂六

國

學

萃

編

善甫吳仲樞



宣統元年春二月
第四期刊于京邸

宛平葉靜齋刻

腹而止莫能測其際涯也大箸鄂宰四稿謹已登領撰述日新實事求是尙冀源源寄讀開我見聞方今士習日穢根柢悅薄不知伊於胡底人材墮壞職此之由天不憖遺海內耆髦碩生翳然將盡後生不見老成即聾從昧將謂讀書學仕不過爾爾甚可悼歎仰繼前良下覺來裔以續百年來經師之緒非先生而誰伏惟頤性齋勞爲道自愛欲言千萬紀綱湓發使平昔蓋闕之疑未及貢諸左右獨恃厚愛吐罄肝鬲輒復頓盡惟矜其直不責其狂愚幸甚幸甚壬子重九後十日次琦頓首

與喻明府論平糶書

新興陳在謙六吉

糶糴商賈之事非在上之所爲也自齊桓公魏文侯始也而後世踵之爲常平倉爲義倉爲社倉皆足以利天下何者凡以爲貧民計而未嘗稍私其利也新興戶口不下十萬有餘者十之一各足者十之三其待糶而舉火者則過半矣然酌有餘以補不足平出入以均食貨雖遭凶荒不難閉關而取贖

而富人商賈或深藏以索重價或轉市以取厚值去秋小不熟耳其始米價長一二分漸至三四分至六七分以至加倍而未已富人之粟短不盈寸其錢已及尺且必欲至丈而後快貧者終日矻矻求一飽而不可得不大可憫乎側聞執事下令平糶百姓稍定沸價少息乃數日而洶湧益甚則謂官粟出境賣矣詢厥所以謂鄰飢彌甚價彌昂仿古和糴之說是執事知其利而未知其害也宋彭龜年之疏曰去歲淮浙並飢江湖小熟始下和糴之令商賈競趨利又復爭糴於下米價既長害及細民由是觀之小熟猶不能移給他所而況其不熟也去年八九月間天稍旱米價略增執事江口置防使粟米不出境百姓帖然其不足者二三股戶耳今不惟撤江口之防且官胸連檣轉粟巨萬愚民無知謂執事覬覦重利行同販豎而向者固藏轉市之徒皆藉口而踵爲之而數十萬人待糴而後舉火者至於欲糴而無可糴卽有可糴而竭一家之營不果一人之腹真能閉戶忍飢相安於無事乎哉傳曰

大夫鄙則士貪士貪則庶人盜執事欲行和糴之法而令部民擬諸販豎則非所以爲名萬一閭閻困迫而不肖之心生於大都白晝則非所以爲實名實並戾亦何樂而爲此也謹佈區區惟執事察之

陳文學傳

東莞何仁山梅士

陳壽期字鏡秋博羅龍華人弱冠試於縣冠其曹補弟子員惇信好義居家以孝友聞父揮霍不事生產家日窘期先意承志凡有所需雖竭蹶無弗應居喪哀毀骨立鄉人敬之父既沒積債累千期經紀撙節不數年悉償舊逋曰無使先人負逋負名也性自儉而待人厚周窶助喪慷慨無少吝佃人之貧病者悉蠲其租鄉鄰有鬪得期一言立解嘗陰出己貲爲其息事有費至五六百者鄉鄰德之甲寅夏盜賊益起賊目黃槐花率黨數千將犯邑城取道龍華索糧食期稚牛置酒召子弟百餘人親率擊賊賊大潰翼日改由他道往期率族人邀擊復大敗之斬馘無算賊銜之別糾夥黨讐龍華期

值知愈自奮厲再捐資招團四鄉義勇千餘人共擊賊又敗之自是賊不敢復至當是時賊勢已挫期軍愈張沙河數十里民獲安堵期之力也十一月朔賊首翟大姑猝陷邑城期聞髮怒皆裂自備糗糧立召各鄉練勇尅日馳赴殺賊家人諫不聽曰城不復吾不還也既至數與賊戰期大呼先登竟沒於陣年幾十有幾喪還無男婦老幼莫不痛哭遠近白衣冠來會者千人僉曰陳君死我輩無甯居矣鄉鄰有訟鬪思之者輒流涕曰陳君在不至此也既葬邑人奉其主配祀宋先賢翟夫子祠期總家政幾廿年無私蓄歿後檢其遺篋舉之重家人疑其金也發之乃一巨硯

論曰壽期諸生耳寇至將脇我雖去可也不去而毀家紓難義足多矣况乎殺賊以死期而死守土者當何如哉夫士能蹈義雖一節足不朽乃其生平又卓卓可稱如是沒而祭於社也宜哉

鄭烈女傳

霍邱朱點衣葆齋

烈女姓鄭氏父永泰爲霍邱胥吏年十歲失怙事母至孝兄三人惟季存姊早寡恆家居女周旋於骨肉間無微不至然性素剛正苟非柵內之言雖同胞不敢進也光緒十六年受同里龔采臣聘爲繼室明年春將成禮而龔猝以疾沒母料女知而必死也使家人秘之越三月鄰嫗至女家偶洩其事爲女所聞女假他辭詢之既塘遂於是夜製斬衰備往弔凌晨作羹進母乃所刲之肱肉也女自是水漿不入於口矣母與兄百計慰諭謂龔殯且久可勿死雖守節亦善女不聽自命輿至姑家泣拜如禮龔遺一子呼之前誥誠之良久乃出徑赴墓門一慟而絕蓋登輿時已潛自飲酖矣先是絕粒之夕夢龔至牖外勸其不死婦謝之曰君有二聘我無二適無復勸我母聞其嚶語而呼之女驚覺大慟嗚呼此非精誠所感者歟尋邑人李灼華等以其事上聞得旌表如例

贊曰女之所爲豈不賢哉人情以死爲難而猶非難也惟於瀕死時使人人

心中覺其志之所在應有盡有而一以從容出之斯爲難耳昔歸熙甫作貞女論謂女在父母家不應以身屬人豈篤論哉凡人之所爲亦視其心之所安與夫情理之所順而已矣閨閣中顧可以聖人之道繩之耶

劉烈女傳

王世積

烈女姓劉氏諸城士人農書女婉麗知書辛酉秋皖賊猝犯諸舉家倉皇相失獨與母隨衆伏林莽中謂母曰賊至兒必死懼不免辱不如先之母曰少須之賊漸近女曰急矣遲將不免起覓刀不可得跪持母泣曰兒清白族一旦爲賊辱如先人何請必殺兒再三促迺解帶因樹絞之狀絕慘母怯纒漸弛復甦怨母曰以兒資賊是豈愛兒耶自起縊樹上氣甫絕而賊至將解其懸有號於衆者曰烈女也勿近邀其衆以去伏林中者數百人皆免贊曰皖賊之禍搢紳罹害尤酷甚有身膺闕寄喪師陷賊不惜泥首屈膝爲之執褻器肩積屍以偷旦夕之生而賊亦遂奴隸之而無所顧嗚呼死願若

是其難耶劉氏女獨從容潔身甘死如飴卒使賊感其烈以去賴以全者且數百人傳曰誠不以富亦祇以義豈不信哉豈不信哉

黎孝女傳

東莞鄧淳粹如

嗚呼女孝之難也尙矣然顯於世者多見於孝婦女孝徵之史冊恒不數數觀何耶蓋婦而孝婦之常女而孝女之變也婦人于歸往往獲事舅姑者數十年以故得盡厥職女自挽髻後始識大義卽不能久侍膝下惟門祚衰薄侍養無人不得已永供子職此家庭之變而孝道之常也故書曰五常凡倫紀中所當盡之事皆天之所秩叙而有常於常之中而遭其變變而不失其常於是乎孝女特傳吾莞孝女黎多娘上坑處士沛霖之女年十六失恃門無弟昆矢志不嫁以事父族黨中欲爲議婚則以死自誓足迹不踰閭外矮屋一椽深廣僅八尺竈牀相并形影相弔一燈熒熒漏下四鼓機聲與促織相間其父不事家人產惟彈棋晏遊是好孝女積誠感悟家庭間烝烝然奉

養二十餘載甘旨悉取辦十指凡疾病疴癢無不曲至父歿喪葬盡禮歲時拜祭淚涔涔下跪至香燼而後興族人復勸之曰大事已畢煢煢孤影何以爲終身謀孝女曰昔之不嫁爲奉養計今父母俱亡功總之親罔有言及嗣事者此身一出血食將安恃乎乃跪靈几前辟踊號泣三日不食族人知其志決議遂寢自失恃後茹素逾四十年粗衣糲食人所不能堪者輒甘之如飴年五十始積白金二十餘爲父擇嗣每女紅間則持孝經及女小學正席南向坐諸娣姪坐東西向爲講明義理及古今貞烈善惡感應事諸娣姪咸奉爲師表焉庚寅春奉 旨旌表後數月卒年五十有七

贊曰孝女生於窮鄉非有保姆之教導見聞之感發也而能扶綱常維名教卓卓如是是亦奇矣世之冠儒冠服儒服自命儼然至考其內行則吾不得知也女真賢矣哉

榮祿大夫大理寺卿署都察院左副都御史馮公墓誌銘

襟送抱佩章質苙證古史之對音論駢文之異體松盟柏悅生幸同時月落參橫談猶未倦以此稍慰岑寂暫忘離憂然南望之心常懸北堂之膳誰侍門前別子何限欷歔夢裏覲親難酬顧復每當魚更三躍掩卷就寢魂游江南之國身在華胥之鄉婢僕賀其速歸弟妹喜而起舞高堂扶杖話面目之瘦肥良友叩門問著作之多寡鄰僮解事樂聞笑言山妻賦詩互相贈答恍惚自思疑爲幻境頽然而醒仍復獨處呼僕舉燭亦在睡鄉仰視東方天光已白一夜十起祇益悵然嗟乎北江先生有言積瘁之士寡至四十者僕之年齒已近三十而學問事業迄用無成儻得策名清時委贄京國竊懷負石赴河之義力挽瓊湯凌鑠之風破柱求姦作中天之一鶚開城創制爲南溟之大鵬此乃上願所存不可必也若夫輯高密之遺書申浚長之輿說誦龍門之雄文校蘭陵之異字含毫邈爾思通古人伸紙斐然精驚八表休息經籍之圃馳驟文雅之囿百家雜語淵匯乎一編六籍微言囊括夫萬象覃思

以終其業咀華以潤其流則我心區區亦竊慕乎是昔北齊劉孔昭云使我數十卷書傳於後世不以易齊景之千駟也僕嘗歎此達言以為美談至乃以科舉為性命視富貴若神仙驚響而尋聲承意而揣色牡羣牝友殷殷云云齒豁頭童灌灌躊躇偶邀顧盼如登天而坐雲略失援繫便墜心而危涕百年倏忽時不我與幸得稟乾坤之至靈承鞠育之遺體甯忍驅役魂夢眩惑耳目隨草木以同腐動友朋之茹歎哉吾鄉諸子並雄於學夙修研思乎國策謙齋振響乎淮南孟樸殫勤乎漢志秉衡覃精乎晉書隱南肆力乎古文木彊疲神乎目錄開篋而視咸有成書閉門而造無非塙論足下又淹貫衆長自成絕學惟善蓄光彩益章令名道遠言略各自努力耳十日以後使車返都再達箋續發函於邑不盡所云同康原名再拜

與人書

長沙 梁廔陶 雅非

廣陶白某足下久絕荊軻耳底之言更無黃祖腹中之賞風颺北海自拯平

生人物南州可憐餘子故清真許劭不多長者之遊而跌蕩襍衡偏重布衣之節惟吾與子崇懷在茲亦抑單弦無山水之期而雙劍欲風雲之夜耳矣乃者寒交之概宜多見面之時何客兒屐齒不到池塘莊生谷音都非聲響想因債臺積累未遇焚券之緣質庫蓋藏不盡臥游之苦王琨避面諸葛登梯其憂患可知也然而纓冠有同室之人闔扉非踞城之智醫門問藥同為疾疢之身越地行舟未必瘠肥之視胡奴之送米目笑非夫王陽之作金心曠所欲貴年盛德并命同功何為鬱陶久不欠身乎史記一册即交小奚餘者南史亦求補闕庶夫杜門雪夜畢邢邵之五行倒屣春風驚阿蒙於三日不禁冬氣聊發河言

答門人岑臻轅論駢體文書

譚宗浚

昨辱過從并示大作華燬五色韻譜六莖豎標亭迥振響清越吾弟際此英年鏗而不舍何患不突過古人也耶承論駢文徵及鄙見僕於斯道頗嘗究

心襟海知源登峰絕隱受顏延之家訓承孟喜之師傅請臚述一二以爲教學相長之助乎夫文章之由散體而變爲駢儷此自然之勢也譬之織絲以爲衣裳而衣裳或加繪繡釀麴以爲酒醴而酒醴更益醇醲踵事增華如斯而已自韓柳振聲歐蘇嗣響哀所自製名曰古文偶體一途遂遭培擊目梁陳爲蟬噪詆邢魏以驢鳴蓋嘗論之屬文者果能樹骨風騷探源訓誥屏除佻冶剗削膚浮則雖字必貫魚詞皆噉鳳究無害爲簡質清剛之作若堯環璋之觀若乃虎賁襲形壽陵學步空疏以爲古澹鷲張以爲怪奇此即使馳騁縱橫或近坡老雍容揖讓遠希廬陵其與駢文之濫濁庸庸者何異是則楚齊得失未有定評董墨是非無庸深辨正不必愛璿玦而輕隨卞嗜蒲蹶而賤性牢也已惟是僞體繁興其弊有二往往詞傷連犢語雜浮夸假烟楮以事應酬挾縑裘以爲干謁驚魏侍中之蛟蜺騎宋游道之獼猴取給一時忘其百拙譬之丁覘十紙便云筆過王褒齡石百函乃詔才逾劉穆是曰應

俗其弊一也亦有鈎棘其詞清羸其貌創爲澀體別啓歧趨鵲不鵲而烏不烏驢非驢而馬非馬譬之賦多奇字遽欲挾班馬之藩詩喜拗聲卽云仿曹劉之作是曰贗古其弊二也此猶舐煉丹之鼎思狃天門浮濟水之匏冀窮地軸何足語於作者之林哉 國朝文教大興英俊雲集稚威以橫翔捷出之才兼淵奧湛深之學振奇吐逸夔絕一時若臯軒之瞻采陸離甘亭之古音璆亮抑其次也至曾賓谷詞氣舒雅而字句時近率易洪稚存筆致高古而篇幅略少變化昔賢絕技未易效顰又如陳其年袁簡齋吳穀人諸君子才力未嘗不豐偉然近己戶誦枚皋之集家傳劉峻之文異軌斯歧未流頗濫時賢所尙慎勿趨騫焉竊謂近年文體日就庸猥將必有揭千年之燭扶九服之輪獨闢町畦自新壁壘者亦猶字母傳於西域擴周沈之舊規畫法盛於南宗變張吳之拙派窮妙極精後來居上吾弟以爲然乎否乎又大作體高格遠無可摘疵惟喜用宋以後事似宜選擇昔飛卿文章或近徵郭令

公故實疊山箋啓并旁及辛稼軒小詞前哲所譏不宜沿襲匪特此也古人篤志墳典文字乃其緒餘是故染翰操觚率同機杼取材運典別自鑪錘雖驅遣不外羣書而領悟各有心得是以任沈隸事不襲左潘王楊屬辭匪沿庾鮑卽至晚唐之溫李北宋之歐蘇亦莫不如此否則搜狐穴之奇拾兔園之唾擗摭故典抄撮類書棄藥之渣重調乎雉鼎缺銛之劍再拭乎鵝膏鮮有不令人憎厭者矣吾弟但當斟酌篇帙沈浸經史口誦千賦手披萬籟自然拓宇崇閣結體淵雅裴遐齒頰如聞琴瑟元音謝朓文詞大有膏腴雋味此中甘苦當自知之無待贅述矣謹緣下問略貢嚙談積雨寒陰伏惟自愛不宣

郭烈婦傳

大典方履錢彥聞

烈婦姓鄧氏臨海生員郭光璋之配也椒莖之質遊馨於初葶蘭蓀之芳賦采於中野惟珩與璜容止不墮聞機追杼令華可昭擢根下里夙仰摩笄之

山習誠孤宗幼入扶風之座出閨之年歸於郭生和諧媿影婉嬖將雛歲在元柀天乎不淑心傷寡鵠之歌陽斷啼鳥之夢羅幃冰蘖保此遺孤黍室霜燈依於母氏蓋將茹恨罔辜冀成立之日形影相弔續已枯之魂者也乃以五載久延百禍未悔文叔之妻方少長卿之子先歿烈婦既莫號於蒼穹決相殉於下地閨戶而縊尙未就絕其母知之挾關以入里俗之論每謂解縊必得少壯布氣乃可復甦母故惶遽遂呼鄰人救焉烈婦訝九幽之可還感再生而愈痛詢得其故憤結莫追卽取交刀自鏹其脣置脣從容而復隕逝哀哉肌膚之愛薄於名節鏤割之傷不聞慘怛是固泐金石而不渝蹈白刃而不辭者矣聞之者色驚知之者心折而自亡迄今逾五十年門無奇行之表臺無懷清之名微顯闡幽曷云能思且夫貞姬之頌代不數人偉蹟之傳史不絕紀如梁媛斷鼻以自伸夏侯毀耳而明潔禮修塗面之智段紀截指之誠之數人者豈皆糜骨爲甘湛身不悔哉誠以志不可苟屈行不可稍汚

迹險而理乃安念純而操自厲彼烈婦之行豈求彰彰者乎然而 國家飭俗敦風言旌行擢井閭令聞之遺必達於上 殿陛敷榮之典必洽於下是則搜采遺芬顯乎志乘者有司之職也而表揚絕德被之絃歌者士大夫之責也罄北山之石徧列豐珉削東海之筠全貽煒管庶可以光斯隱媿激彼貞風

贊曰寒雲入壑貞柯不移逝波凌川精禽何知貞柯雖頽郁條白樹精禽雖勞冤恨何補烈婦之生荼酷夙嘗烈婦之死慘厄載傷繄母之愛而屑之汚屑則受汚屑非我膚維屑之亡厥寒在齒維婦之生爲母之恥懷懷自矢愴悵全歸景曜匪謀懿美何微瀟湘之南無復宿草丹雪積尋青緇回繞千載其懋百世其型願翼禕册永此嘉銘

常主簿母蔣氏墓志銘

湘潭 王閻運壬秋

太宜人蔣氏父名曰光其先澧州人也北渚芳蘭秋水夫人之國秣陵桂樹

內袒 楚莊伐鄭鄭伯肉袒牽羊迎之

陽喬 宓子賤將適單父陽書謂曰吾贈子以釣道夫投綸錯餌迎而吸之者陽喬也其爲魚味薄而不美若亡若存若食若不食者魴也其爲魚博而味厚子賤至單父冠蓋迎接於道曰晝所謂陽喬者也乃請耆老與之共化

答屠田叔

足下得官如左太冲亦大陸沈哉雖然三都賦草在橐中便覺記室不卑耳奴還言田叔冠側注著單鮫衣將一平頭往來官奴城下猶故田叔哉子陽輩誠井蛙千載而下令人欲唾其面僕漸老家益窶無他長物惟齋頭青松謾謾有秋江八月聲支離乃似僕計僕者書成當作龍鱗也足下樓居高幾尺可望見海月無僕且持胡牀箕踞其上白眼視諸卿求田問舍碌碌黃塵間如蜷蜉轉丸不覺絕倒齋額等書成無嘉木遂不命淵氏章叔能言僕近

狀故不復談

左太冲 晉書左思傳思貌寢口訥而辭藻壯麗不好交游曾有三都賦
記室 三公大將軍皆有記室主上表章報書記

子陽輩 馬援謂隗囂曰子陽公孫述井底蛙耳而妄自尊大

唾面 趙太后不欲以長安君質秦大臣強諫怒曰有復以此言者老婦
當唾其面

答張孺愿秀才

稽康懶作書僕自謂過之遂無尺一致足下然足下風度皎然在懷章叔至
承足下近狀甚善僕且老矣不能復雄飛吳兒憤憤尙見妬謂其眉如月也
僕攬鏡自照直狼籍半額耳今歲建樓居欲盡納城西山色倘臥而見翠微
不羞老作元龍豪士態足下以謂孺毅或當擊節邪

稽康 康絕交書自謂簡與禮相背懶與慢相成故人稱稽康懶

雄飛 趙溫爲京兆丞笑曰大丈夫當雄飛安能雌伏遂棄去

吳兒 北人謂南人爲吳兒

眉如月 古語女惡蛾眉士惡多才

元龍 許汜曰昔過下邳見陳元龍無主客禮自臥大牀使客臥下牀劉

備曰元龍湖海士豪氣未除君求田問舍言無可采臥百尺樓上臥君

於地下何但上下牀之間去聲耶

與陳所敬都護

明將軍以舌鋒清海氛勝十萬水犀精甲奇功與甘延壽陳湯傅介子相亞
設遇漢武帝卽冠軍侯不難致乃節旄落盡僅得一都護文法吏復索癥而
詆之使去將軍今且歸臥田間髀肉生幾許金僕姑安在射秋風雁一發飲
羽聲如裂帛雲中令妻子輩撫掌大笑差勝執兵謁白面生時也頃聞將軍
買石如平泉美箭香草貫以清池載酒問字客子雲集僕聞之幾欲神往廉

將軍馬伏波並一時之雄及其老也猶對使者食肉披甲據鞍示矍鑠希寵人主之前此其念何殊雞肋哉明將軍視之真腐鼠耳然僕願將軍善飯如廉頗也

水犀精甲 夫差共衣水犀甲者三千人

冠軍侯 上將曰冠軍侯言功冠諸軍之上也

索癢 魏證云今之刑賞或由喜怒怒則洗垢索癢猶言吹毛求疵也

髀肉 劉備歎久不鞍馬髀肉復生

金僕姑 矢名

妻子輩撫掌大笑 賈大夫貌惡娶妻三年不言笑御以如皋射雉獲之

妻始言笑見左傳

平泉 李德裕有平泉莊多置花石戒後云鸞平泉者非吾子孫有與人一木一石非佳子弟也

載酒問字 揚雄善識奇字劉棻嘗載酒就而問之

矍鑠 輕健貌馬援自請征蠻帝愍甚老援據鞍顧盼以示可用帝見而笑曰矍鑠哉是翁

答范堯卿司馬

東海有兩司馬也而賢不肖平時籍甚耳中矣往識張司馬矢矯如神龍顧於明公未有謁也意軼然如望蜀蓋中心藏之者又十年而不虞公之臆間亦有王生也將無田叔輩頰頰邪田叔之嗜羊棗而私於不肖猶可以溺乃公過矣捧書敬誦字字明月幾欲剖腹乎不肖之報汝南公甚愧於智氏之國士而僅託於絮酒炙雞白馬素車之下風此其事曾足多乎聞公之獎賞則慚怖欲死異時或以田叔故而獲執鞭於公卽不肖之自幸不減乍識張司馬時也

籍甚 陳賈傳云名聲籍甚猶言狼籍甚盛也

望蜀 光武賜岑彭書曰兩城若下便可將兵擊蜀人苦不知足既得隴復望蜀

剖腹 唐太宗曰賈胡得明珠剖腹藏之

絮酒炙雞 徐穉不就薦舉薦者死以綿絮漬酒裹炙雞至葬所奠之

白馬素車 張元伯范巨卿二人交善張死范隔千里夢張告之范白馬素車而往果死

寄陸大學

足下朱汗五花第自惜障泥不渡耳誰得阻其驍騰而使僕緩頰邪大司成目如九方臯當求足下於驪黃之外湖上之役假晷刻數息歸對兒女子依依牀簀間安用鬚髯如戟哉足下其幸努力無徒事此爲也

朱汗五花 良馬也

障泥不渡 晉王濟善解馬性嘗乘馬不肯渡水曰必是惜錦障泥也解

去乃渡

九方臯 伯樂謂秦穆曰臣有所與者九方臯善相馬公使求焉還報曰已得之在沙邱牝而黃也使之往視曰牡而驪公不悅伯樂曰臯之所視者天機也得其精而忘其粗在其內而忘其外馬至果良也見列子與小陳觀察誕先

觀察公頃何似學圃五舟之間秋樹如沐翠色滿衣裾矣一部清商樂已教成吹明月上花枝顧不令髡乎盡一石哉樂甚樂甚寒齋梧栝經雨濯濯僕挾一編箕踞樹下倦則擲去聽秋鶯殘弄澀如老妓歌桃葉半嗚乎咽則大愉悅以爲不減江州琵琶絃上聲公聞之當大噓謂王生不知漢大耳

翠色 右丞詩山路元無雨空翠溼人衣

髡乎 淳于髡云髡心最歡能飲一石

桃葉 王獻之愛妾名桃葉故作歌云桃葉復桃葉渡江不用楫但道無

所苦苦我自迎接

江州司馬 白樂天左遷江州司馬秋夜聞長安妓女彈琵琶感之因作
琵琶行宛然琵琶哀怨之聲

答龍龍安

獲公尺一何翅十部從事邪而況其纍纍也其寵施之過當不肖曷以報國
士哉郎君英英如明月珠子夜光的礫異時當觀其照乘耳以書請善化公
護其外家惟謹想其枕獲高矣烏薪遠貽寒士之廬煦然挾纒于以卒歲不
憂黑貂之弊手瘡甚搗管流血被腕欲書近作奉覽且不能俟文生北還當
繕寫盈卷

十部從事 劉宏每發手書丁甯歛密故人皆感曰得劉公一紙書勝於

十部從事

明月珠子 魏惠王謂齊威王曰寡人國小尚有徑寸之珠照車十二乘

存韻云別足鬻拳忠孰諒剖心金藏死猶喧感事云民持劍戟銷農器吏指
萑苻當虎賁雨夜云人事蕭條連骨肉年華磨折尙風霜皆沈痛必傳之句
余尤愛其苦雨疊前韻七律四首及宿天甯寺望殘月七絕四首弦外淒音
不忍卒讀錄之以質當世云

苦雨疊前韻

時節冥冥似禁烟吳儂愁歎雨爲年枉驅陰氣鞭陽石難譜宮聲入潤絃祈
霽文誰高震俗掃晴娘已老無妍遽憐潦霧英雄恨長在飛鷺跼跼邊
日月高高凍有稜閩風涼透玉樓層銅仙漢代懸雙淚金佛西方恃一燈大
地風光餘黯黯諸天春恨白騰騰何時催換人間歷看取高陽薦赤繒
洞口兒童誤看棋癡龍行雨漫無知商羊豪舞衰周世黑螟狂蟠神禹祠人
事愁難逃浩劫仙家閑自種相思 近有雨紅豆事 連邦麥爛憂非細何處療飢覓紫
芝

氣象非堪彩筆干敢忘憂患恥微官海將大陸推沉易人爲皇天補漏難倦
馬愁牽輪四角荒雞催上日三竿收靄撥霧非吾事幾夕潺潺夢未安

宿天甯寺望殘月

一鈎夜深出慘色雜黃碧只合白楊頭深深照幽魄
萬里精靈泣中宵客影孤揚州此時看也並一分無
破廟狐嘯影荒墟鬼唱歌嫦娥悔偷藥幽恨此時多
夜靜更西轉斜光入佛樓照他樓上佛笑面也含愁

陳翼謀水部丙子行

陳翼謀水部士苞爲湘中名士詩才橫絕有甲辰二十八初度自述一百韻
爲時傳誦今年秋初寄示吟稿二卷余讀之佳作甚多君爲長沙張文達門
下士契洽逾恒稿中祝文達六十壽五言長律及挽文達五律四首均一往
情深挽詩已錄入詩史詞文旨遠足令文達生色又有丙子行七古憂時望治之殷

溢於言表其所贈姚主政一鶚殆亦今之有心人也

丙子行贈姚主政一鶚有序

余丁未冬始識姚君叩其齒長余裁一月因舉東坡嗟我與君皆丙
子四十九年窮不死詩句以謂兩人者年不逮蘇沈其窮何相類也
君僑寓蓮華寺去余居數十武時時過從暇日爲長歌贈之卽用蘇
句發端命曰丙子行

嗟我與君皆丙子骨相數奇差相似文章三十輕王侯閉門高臥呼不起相
逢柳市肝膽豪黃海新歸試寶刀屠龍剋兇壯夫志眼底燕雀何嘲嘈我昔
竄戴傷麟鳳挾策豈肯干時用表餌欲行賈生書孤憤自抱韓非痛豈知高
論今不行政疏萬言空傳誦泣緯誰識漆室愁看花乍醒春明夢君負壯懷
正森發獨向東海拾明月懷鉛日繙綠字書申商微言得口說餘子橫議聲
蒼蒼掉頭微笑心不奪佳日放棹琵琶湖十里烟雨饒菰蘆四月櫻花江似

火觸撥春愁思故都爾時東鄰閱蚌鷓礮煙彈雨肆馳突直取上都作戰場
陵草遍染萋宏血我從壁上觀殘棋袖手神州叫奇絕風雲粗定猶瀕洞詞
臣欲進昇平頌 聖主憂勤議改絃羣言淆亂輕一闕五使持節通歐墨車
塵佩玉動萬國卷髮士女擁道看官僕赫耀人動色東鷄西鷄何忽忽觀政
采風購新冊功成歸報受上賞萬民望治愁飢溺年光流轉驚如電新法損
益何曾變老成勝算懲浮囂忠厚由來恃天眷江河寸陰真當惜乘時赴機
須戮力千鈞一髮繫存亡坐俟河清嗟何益與君各抱杞人憂倚劍懷玉向
誰投天閭馮翼不可極蒼鳴蛙語徒啾啾白頭相催兩年少伴食郎官但坐
嘯共話當年困水曹阮生痛哭鄧公笑君才勝我終高騫秋鷹俊鶴健無前
餘事新聲擅秦柳幽花清月鬪嬋娟世變滄桑何忍道升沈剎那亦偶然從
君沽酒蓮花寺醉吟日日聽啼鶯

蔣紹由擬少陵諸將

蔣紹由 師轍青溪詩鈔 風格甚高且多感憤時事不媿少陵詩史之遺余愛
其擬杜諸將五首今錄於左

當代深源負盛名節旌驟擁氣縱橫早聞眼底空流輩自是胸中富甲兵防
海貌貅方養銳逼人蛟鱷太無情橫流十萬生民血化作秋濤有聲怒
雄師出塞蕩烽烟失律龐參引退年到處望君如望歲本來依漢等依天併
兼勢遏莎車橫斬捕功推羶騎先門戶朱維須扞蔽不徒字小奮戈鋌
天討東南撻伐張鑿門元老荷恩光經年狡寇猖狂甚半壁巖疆控馭長早
是據鞍矜鬣鏖未妨擁節暫迴翔健兒悵下誇身手小隊弓刀氣自揚
滄瀛黑子嘆孤懸開府虛崇闕外權敵艦乘風如使馬將臺倚霧看飛鳶危
疆搏戰瘡頻裹諸道聲援壁自堅畢竟羸師雄一幟長城遙峙海雲邊
雄關兩去隄如雲壁壘多時掩惡氛齊潰須防九節度無功已愧五將軍聲
威自古資專闕智略何人迥出羣搏景漫言真勁敵與尸早歲記頻聞

劉爾侯日本刀歌

湖南新化劉爾侯 洪度 著有柯園詩草五卷尙未付刊詩筆頗為雄健人品亦峻傑不凡湘鄉侯相治軍時曾招之出山函牘聯翩而至爾侯因眷戀庭闈未克應召惟作詩以報知己之感而已幼遊於廖海澱先生 可受 之門風義甚篤海澱有鑄鐵齋詩存即爾侯所刊行也柯園詩草四五兩卷均係詠史詩前三卷多感憤時事之作余已選鈔數首於四朝詩史中茲更錄詠日本刀七古一首以見一斑

日本刀歌贈劉玉卿 芳成都轉

飛泉可出山可開戰地疑帶腥風來曾聞入陣斬蛟鱷無數轆轤頭顱摧借觀舉座驚龍掣脊上模糊漬殘血白云千金購日本七尺微軀裹霜雪憶昔鼓鑄煩神工精金入冶曉日融扶桑湧出寶光注金烏側翅投爐中鑄成淬用長崎水 日本龍宮顛簸愁傾毀天吳海谷見猶卻試問何人不披靡自賦

閒居髀生肉東海蛟胎韜截玉宵寒一作匣中鳴燐飛野鬼啾啾哭我聞此語為君豪仰視北斗蒼天高世上翻覆生波濤戒心猶有笑中刀

劉濡深楚逸民詠十二首 附寄詩駢體小函

瀏陽劉濡深 善澤 吟稿甚富今年秋間郵寄兩鉅冊示余并代任搜輯湘中諸老隱逸不仕耽吟好古之作凡六七家已悉錄入四朝詩史矣濡深之詩雄傑兀傲可傳者甚多詩史所錄如山鳥篇七古及遣興七律二首五律四首均有沈鬱頓挫之概然僅足見其一斑余擬他日為之選刊專集以行世 或入同光十子詩選 濡深寄駢文答書氣息馴雅讀之可知其人矣

濡深有楚逸民詠七律凡十二首自王而農夏叔直兩先生迄於潘章辰夢白兄弟余本擬選入詩史因為篇幅所限故錄入詩話

濡深荅余函 第二次寄詩 時在戊申八月

師鄭先生大人閣下捧誦瑤章曷勝景慕猥蒙獎愛渥荷齒存 善澤 幼航林

壑篤嗜枯嘯權棕蓋鈔馨逸未能擁鼻呻吟幾類兒女瑣語埋頭咕嗶不外
 人間小書每對露蟄夜鳴烟禽曉話握蘭折麻都託篇什月孤影獨空山嘯
 寒雖余情其信芳將敝帚以自享俛仰身世良用盡然邇來世運陵夷學術
 日替風雅一事久已視若土苴先生鼓吹休明潤色鴻業輪扶九服真主東
 南壇坫之盟障作百川尚勞我友印須之喚氣蒸滄海珠將測月而探地隔
 銅山鐘自應霜而響於濟南多士之列不遺吳下阿蒙山澤灑儒要云幸已
 矧乃據壯懷於夕露參世變於朝華刺滅三年知心何處涕長一尺溷我是
 鄉輕塵動弱草之嗟聾俗忘雷珉之響九邊烽火徒興吳帶曹衣三遍雞聲
 孰判巢醒堯夢所以秋墳唱詩黃葉成咏青林黑塞大有吟魂先生智珠在
 懷神鏡爲眼充其樂道人善之量應不數牛宏五阨之言也臨書倥偬不盡
 所懷翹首天末無任延佇敬請撰安後學劉善澤頓首

楚逸民咏 十二首

詩羣卷二

番禺沈宗畸太侔輯錄

王闓運

字壬秋湖南湘潭人咸豐壬子舉人
賞翰林院檢討著有湘綺樓詩集

擬焦仲卿詩一首李青照妻墓下作 并序

嘉慶十一年冬十有一月晦日湖北傭人李青照妻爲主逼逃復遇强暴
 攜子赴湘而死夫亦自經經墓讀碑作詩云爾

雙鳧不能飛十步兩連翩張氏有好女辭家來李門頭上青絲髮纖纖兩頭
 盤約略蛾子眉參差掠鬢鬢雙耳若連璧荷葉承珠環紅白左右鬢不用粉
 與朱斜肩若垂玉回腰帶輕縞素手出廣袖青繡緣領裾單繡蹙金線雙繡
 雲中蕖行纏約春羅二寸稍有餘瑣細作微步盈盈若波流不言共知美誰
 能不稱姝妾是貧家婦家貧無華妝脫我嫁時衣著我青練裳上機織縑素
 中廚治羹湯里鄰謂新婦新婦固不同東家言姣好西家言賢良朝烹穀作
 糜夕持絮作衣無衣常苦寒無穀常苦飢朝持絮作衣夕采葵爲羹無衣猶

可寒無食難可生我有纖纖手可以紆縫組東鄰貴家女十指不拈線持我手中巧作我家中飯昨日主君還全家事游宦便可與君行莫令此事散雞鳴外欲曙夫婦嚴裝辦還歸辭父母出門別親黨今當雲南去雲南天一方主君作高官不與州縣同峨冠青金石雲雁繡富胸高橋曳長旗圓徽兩檐紅船頭鳴雙鉦從岸到江中隨人四五十行作鳧雁翔引婦入拜見主君大歎美平生實未見舉止自生光舟中何所爲且暮無期程低頭向江水道迥且長朝辭金口去暮至赤壁山不聞鄰人語但聽鼓吹喧莫發石頭驛早至洞庭湖不聞夫婿言但聽主君呼主君呼婦前甯可相順從珊瑚爲卿枕玳瑁爲卿牀婦謝主君言賤妾甘困窮况乃事夫久大義不再更主君大拊掌真復違我旨汝是貧賤人復言何道理昨日爲人奴今日在官傍何不早作計汝何不自量我有金耳釵赤玉如意簪玲瓏翠戒指手釧珍珠嵌百褶金繡裙四合杭絲衫婢妾六七十不得挂眼角吾今但告汝此事非大錯斑

鳩共成對不能愛孤鶯妾是愚賤婦不堪賢主君私語向夫婿轉身自摧藏與君早作計昨日主君語茲事不可長行行十餘日遠望長沙城鐵鑊下中流云須數日停江湘南北間回首自悽皇及茲背同伴形勢已蒼黃空川復昏暗月黑夜未央偕行出忽忽忽遺囊囊謂卿暫待此吾當復暫往蛩距一分散奔走不成行夜鴉啞啞啼嚴霜墮道旁船上燈燭光岸上行人多風寒天欲明旁皇將奈何莫爲異鄉婦舉首迷東西觀者不轉眼問者來相欺雞鳴五更盡是時其夫來不知期何所心怯形復癡俚俚至明發各各成驚疑城中無賴兒三五生崎嶇詭言得夫婿象掃作要期給婦更渡湘四人於小舟謂婦汝無然孤身欲何爲潛行苦多畏聞此心膽壯激我義烈情吐我心鬱快長號啼向天隘哽涕盈眶舉首謝夫婿相見待泉壤昔年爲君婦膏沐有容光脫我嫁時衣著我青布裳入門無衣食出門別親鄰悠悠生死別初意實未防妾今事當死妾死君獨生死者不可再生者壽命長懷中一尺

兒抱頸相向啼不得從君去但可隨妾旁舟邊一尺波烈婦命長終是日大風雨青天爲不陽青照得聞此沈痛迫肝腸鳴冤赴縣門願早治好凶縣令何多材車馬如趨風三八爲良日盈盈公府中伺候長官意例不問詞訟餘官十餘員云在發審廳首縣請刺員幫審挂虛名民命小小事况乃異鄉客誰能聽其詳微賤無所爲裴回出城東還歸道路長無家內煎烹黃泉有良會母子相追從俚人初定悽悽鬼相迎吞聲顧樹下自挂南枝南縣令聞此事忸怩無容顏使君聞此事頰耳不能言長官聞此事持須共言難平生丁明府今日見此冤還歸坐堂上朱籤出縣門但捉岸上兒不上使君船煌煌大清律首從並梟竿父老聞此事歎息告家人昔爲役人婦今得禮部旌城中羨其風城外造其塋仰瞻天心閣合葬醴陵門南城秋草長墓上還芊芊子規過之啼血下何淺淺生是連枝木死是雙飛禽雙禽將一雛似欲言其冤童子爲之歌婦女無歡顏悠悠四十載石上字已湮網紀貴賤人彷彿

垂斯篇

獨行謠三十章贈示鄧輔綸 有序并自注

彌之見過山中除夕設飲追語二紀前娛園之會後歷安危宜有紀述要與連句謙退固辭豈將激發鄙情亦時遠事衆誠非率爾所操因及暇時輒綴數語積日所得總爲一篇命曰獨行謠詩曰聊以行國又曰我歌且謠蓋明於得失之迹達於事變懷其舊俗國史之志也故綜述時賢詳記大政俟後世賢人君子興起除夕因以除夕發端

一晨復一宵聽我獨行謠獨謠君獨聽歲月一何遼憶我年十五體羸志未

修呻吟窮巷內學作康衢謳儒冠樂羣會始得通羅劉

長沙羅馬贊熙載族兄弟也識武陵劉鳳

巷道光二十七年余讀書三丰始識二羅因劉論詩乃聞彌之兄弟

此時聞常鄧

長沙常綏弱冠能文先交鄧兄弟爲湖南同時諸少年生

傑之俊高詠鏘鳴瓊鳳皇不孤響燕雀隨秋秋寒冬步從我玉佩貂襜褕十里

還城南夜燭明如珠城門丙夜開民物共歡愉分題賦南閣君獨悟幾超

與鄧

同人登天心關余方樂娛游明歲果告災荆澧連大浸桂象亦無禾道光十九年
作賦已知將亂湖南巡撫所領院司庸且疲陸貪賂則廉其智各自謀
湖廣水南郡介其中為漢江南四郡院司庸且疲陸貪賂則廉其智各自謀
早民飢南郡介其中為漢江南四郡院司庸且疲陸貪賂則廉其智各自謀
巡撫陸費牧令久俗鈍參錯七十都湖南六十三縣楚危若振蕩越亡如爛
魚洪秀楊秀清二人假法琅西沃教有名號盜初起即禁倡和連潯梧山
起先琛也起州縣患獄訟多滯給至堂令人推之出門吏不肯坐堂上其家人
明察著稱道光撫奏草先中樞彰云上厭事調發煩軍輸自雍正設軍機房行
末官廣西巡撫光撫奏草先中樞彰云上厭事調發煩軍輸自雍正設軍機房行
道光中穆彰阿最專且久直省督撫多先咨上意乃具摺言自西夷事起
宣宗知天下財匱一意節省聞與發額不怡廣西盜熾鄭告穆穆令秘不
以文宗既龍飛其變乃具疏選將由固原薦材未云誣鄭始奏請自詣平樂
益調固原提督向榮率誰輕窺鼠機林死降李周代官更遺鄭春職以鄭鳴
兵討捕榮後為名將李星周剛意輕李雁行始不和奏用軍二萬大臣舌橋啖
大俄道病死代以李星周剛意輕李雁行始不和奏用軍二萬大臣舌橋啖
是時調兵不過數百總集三千人止矣周乃奏言盜未可輕請募二借哉謀
萬人寇起言兵無過周策其後歸病死文宗特賜諡文忠思之也惜哉謀
不用足為後世模鄉使并全力武宣掃無餘置此曲突計焦賞頭曾胡斷斷

浸上聞命帥轍尙阿李具奏請特派大臣視師朝議知其名周乃以軍機大
者之朝出清望臣十六枉貳車一飯巴陵館但見訶膳夫京中僕隸貪恣至
肉中以為進矣六月守永安左向頗右鳥洪寇據永安圍師五萬將領百數
向持重也失律債四鎮桂林閉闔鳥追寇逐圍省城於吾未云於於寇
不向相能也失律債四鎮桂林閉闔鳥追寇逐圍省城於吾未云於於寇
膽氣轟出湘謬走柳徐路又不圖咸豐二年四月寇出全州入永道不能
空虛欽差大臣所部在桂林多敗散湖廣一坐土城內湖南省城郭多民
總督程潛采湖南巡撫駱秉章皆不治兵一議棄衡州居築土城護之或議
焚屋清野略與羅繞典議不決寇一議棄衡州居築土城護之或議
迫城下駱羅在土城幾為寇擒也一議棄衡州居築土城護之或議
扣南門民吏但驚呼蕭朝貴以二千人從攻省城已至無覺之起尹培
立一士當百夫甯為壯士死不作欽差逃石馬鋪屯陝西軍五百人福誠將
將尹培立率飢士拒戰自閉至蒼黃乃閉城八十日其徂其年七月海圍城
日中營破乃死故城門得閉蒼黃乃閉城八十日其徂其年七月海圍城
君時直閣門余在傳淺湖始聞易師詔乃用鹿邑徐時以徐廣西夷約踐
庚大船鄉番禺和戎我所諱撐柱不入郭以茲得封爵名字溢寰區初道光

廣總督善英私許英吉利入內通商期以十年立約至庚戌夷使至廣時議

州徐為總督登其舟迫令出洋夷人本無戰備故去徐以功封一等子時議

盡盧仝陳生對唏噓商邱陳景雍及河南京果然噉畫餅不能補羊牢徐至

停七日不及兵事於時巡撫兩司余時自樂平濟源李仁元知樂三月千里一肩

與平行至城根不見官賊徒寇圍城唯居南郭夜投魚船宿烹菘肥似膏

明晨告府主帖下架鹿盧鍾音鴻無回信亦不遺詰所往明日書告長沙知府

者毛丈將相共出入吾亦緹我腰猶蒙邱嫂嘲啞啞笑縣猪棹城東北並設枯

運如也入相余以入守諸軍人羅以出戰羅丈繞典治團防好談譚題曰出將臥聽沙

井角坐吹南樓笳寇設旗幟白沙井與楚勇營近客謂領將江忠源宜拔其

物必有賊寇化城隍神大像與對坐人呼為鮑迎善公是時青衿散獨與彭郭居善化彭

郭新權郭生賦七哀彭子慕廉頗城中尚歡笑士女縱娛游雖聞地雷鳴不敵

瞿鄧刀寇穴地圮城副將郭紹良瞿勝退如何洋礮威近欲欺中華厲階蚩尤

兵矢石更礮硝兵火終自焚利器豈防軀守城未論功忱惕夕至朝寇初

撫張亮基等以無功朝廷務寬大張向並有褒疆臣失郡縣自此改例條向

非戮青虜軍法無所加豐四年斬湖北撫青虜臣有為法死主有縱與操洞

庭散漁筏漢口聚商棧湖北財乘至漢口又得商人斷行舟舟聚黃口寇盡得推

能誤雙福閉戶啟四郊湖北撫常大漢以文臣不習軍入城自壞漢陽府

知府董振鐸游擊李信皆文武將才死藉寇長虹橋向軍有王錦繡常祿能

守長虹橋不聽後援委以五百人俱死藉寇長虹橋兵敢戰先至武昌請扼

軍不得過以手城陷浮橋連江漢羣盜始翔翹寇作四浮橋其二橫江舟楫

行臺坐傾亡十萬殉干戈徒驚忠貞盛灑血江漢波武昌破巡無以下並有

十縉也待雷霆印界陸尙書徐廣縉終未一至軍與人書云惟有屏人皆坐

罷奕公獨早自夸伏波久據鞍衛伯果執殳全衆五十萬疾以千人驅寇出

命還江自請督軍三日即發自將不滿二千前鋒未交旗後舫忽轉頭總兵恩

自死陸舟方下其夜芾慶死灰色宿厚反風議同奉命防江者江西撫張芾

巡捕官燭令遽走芾慶死灰色宿厚反風議同奉命防江者江西撫張芾

軍群厚藩司祁宿藻聞陸敗芾樂九江文慶空安慶不知治父囚但恨莫敖

驕庸奴卒併命如絡在一邱竟符金桂識共唱耶穌妖三年二月寇破江寧偽建國先有謠云丹

棧插金瓶無根總不成寇以妖言起既成事猶令衆拜天呼爲父呼耶穌爲大哥故來無附者耶酥非夷言乃隱語也耶即父也蘇死而復生也謂天父

能生人也余還過南昌娛園梅始苞分牋輒懷君置酒且揮豪昌府鄧仁莖知南

官居府中余於解圍後還樂平過留居府齋娛園龍譚過東道陵譚福琳以

除夕劉燭連句爲長歌自餘歲有祭詩之饌

會試至淮風雪纏馬鑣淮揚哭途窮公車避軍囂琦侯起徒中琦善貳以學士

劍許乃曰榮佩關防琦善向榮俱授欽差資格不拘饒州既已空林李遂

波河寇將李開芳北犯由揚州從鳳陽歸德開封懷慶遂繞山西直隸及

大軍所滅天下乃震動南北分欽差勝生本從琦用以直諫嘉勝保以閣學

北援遂授欽差代訥經老不庸棄彼若縣匏鎔也吳文亦文俗采名命督湖

先朝老大臣一一在大僚是時君先公分道筦糧儲沈李議漕折余預聞

訐謔鄧陽令沈衍慶與李樂平議漕事李議盡運九江長算駭衆輦各自撤

藩籬從茲成分播俱歸守鄉閭余與鄧弟不果行長算駭衆輦各自撤

外子來書以詩附答

寒雲漠漠起愁思常覆蘇娘織錦詞五度懷人宵見月一燈課子夜鈔詩繡
餘鴛頸工偏倦香入梅心冷不知記得臨歧分袂語小桃花放是歸期

春曉偶成

烟篆初消曉色迷瞳矓日影上檐西是誰喚起紅閨夢簾外杏花鶯亂嘯

憫忠寺懷古今名法源寺

唐寺今猶在憑觀幾溯洄入雲禪閣簷洗雨石壇開戍想征人恨題慙幼婦
才深閨重懷古不爲聽經來

夏日卽景

綠窗停繡苦中伏火織高張樹陰縮置冰近榻不知寒欲剪桃笙換新竹披
簾仰視無纖雲流波誤蹙湘裙紋呼童削瓜期解渴碧空偶翳輕雷聞須臾
風聲周戶牖跳珠點向荷盤走蜻蜓銜尾雙飛來缸裏有花開素藕檐暈漸

稀宵復晴熱惱散盡詩懷清香鬢更髮新茉莉晚涼坐到參斜橫

花陰

雕文小几坐花陰閒譜冰絃試玉琴彈到流泉聲繞指纔知庭院已秋深

閱邸鈔喜官軍蹙賊江南指日告捷

秣陵遙見起烽煙藤峽烏蠻遽蔓延白簡未馳中壘劍黃巾齊擁大江船將軍幸已從天下狂寇應難冀瓦全擊楫豈惟名士奮深閨同盼凱歌傳

醃菜

量鹽壓石興忽忽旨蓄先冬計早工幾度殷勤封臘甕故鄉無此好秋菘子外與予先世皆自浙移京戚族自南來者每謂此味以京中為第一

窖花

凌寒翠竹騰牆隈餘卉收教暖處培為想明年香更盛千紅萬紫帶春來

朱韞珍

字琬卿大興人山陰馮怡棠比部元配蚤卒有浣青吟藁一卷

望月

昨宵一雨見精神金粟蠲香影更新身似白瑤宮裡住不知何處有紅塵

偕兩妹臨帖

晨興幾度繡工分攬鏡忽忽理鬢雲愛趁小窗花影畔靈飛同寫玉真文

題怡棠所畫綠萼梅橫嶺

繪得名香出拈毫句喜題澹標仙子品高稱雅人妻豔色卑桃李清風飽藜藿因花令婦忘卻白雲棲

偕怡棠謁外大母墓

伶俜深荷老人憐恩等含飴過十年太息鳳雛今得偶綵衣空拜墓門烟

曾

彦字季碩華陽人張子馥之室能詩工隸篆早卒有度共室遺集一卷

題殘春圖

小樓夢破梨花雨簾外流鶯驕不語春風一夜作秋聲碧樹沈沈亂紅舞麒麟

麟公子氣如雲傷春惜別同司動壺天暈碧光陰暖芳沼流紅夕照曛垂楊
 葉老燕雛飛菖蒲花開蝴蝶稀游絲百丈絮雲熟萬里茸茸春正歸門前草
 引春魂轉借得并刀不能翦芳樽綠蠟餞殷勤玉柱金徽蕩悵怨璇閨窈窕
 識音人珠玉爲心蘭蕙身鸞皇錦織初成匹鴛鴦絃理重翻新園中餞春春
 去遲人間久已悲空枝幽亭客散松煙起獨鶴徘徊聽詠詩

玉階

玉階消積雪娟娟瀉瓊液春風昨更寒爲感江南客簷前辛蕙花高枝已爭
 發鮮姿復先榮婀娜誠可悅但怨微芳衰颯風不汝惜

通州舟次

姑蘇城邊春再來清溪處處春花開北風海外變蕭瑟黃塵漠漠驅春回枯
 木無枝堆殘雪白鷗沙際蒼茫立頽陽歛歛下西山船頭佇立愁將夕橫風
 吹波舟行艱舟人辛苦生煩冤

水龍吟

落花飛絮茫茫古來多少愁人意游絲牕隙驚鷗樹底暗移人世一夢醒來
 起看明鏡二毛生矣有葡萄美酒芙蓉寶劍都未稱平生志 我是長安倦
 客二十年軟紅塵裡無言獨對青燈一點神游天際海水浮空空中樓閣萬
 重蒼翠待驂鸞歸去層霄回首又西風起

蝶戀花

一片閒愁無處着空裡游絲直任風飄泊望斷闌干天一角夕陽那似春魂
 薄 青鳥無端傳密約玉印檀痕莫負香香諾王母桃花開又落彩雲夢遠
 閒池閣

長亭怨慢 和素君韻寄遠

聽黯黯長安夜雨那是儂家放教歸去繁短牕虛夢魂彷彿到江浦愁生無
 定應是有生愁處寄遠織瓊花渾不省涼蟾天宇 凝竚祇蘭紅波碧依約

謝娘眉嫵文園病也更堪觸傷春情緒便月痕不上菱花儘難忘衣新人故
但乞取天憐他日翦燈深語

虞美人 題李香君小像

南朝一段傷心事楚怨思公子幽蘭泣露悄無言不似桃根桃葉鎮相憐
若為留得花枝在莫問滄桑改鴛鴦鴻鷓一雙雙欲采芙蓉憔悴隔秋江

點絳脣

惜別經年惜情長憶卿知否近便羅袖蜜意花房逗 借看釵鸞私搯纖纖
手端相久眉痕依舊只是黎渦瘦

樊增祥

字雲門湖北恩施人光緒丁丑進士現官江甯布政使司布政使有樊山詞一卷

浪淘沙

旅中寒食

啼鳥喚春分細雨銷魂故園花悴女兒墳歲歲辛夷開似雪流水無人馬
上幾黃昏月子如銀自家尋夢與溫存恰似銅爐煙一稊消也無痕

長亭怨慢

題張樵野慶伎琴臺秋使圖即遠之山左

聽江笛烟中悽語喚起汀洲斷鴻無數渺渺晴川暮帆搖曳向前浦月痕娟
楚剛照入牙琴去除却酒樽時只載得焦琴玉塵 凝佇把山公高致寫入
淡煙輕素黃鸝去也又相送晚楓江路蕙帶結滿握愁紅柳枝怨明湖秋雨
算賸有琴邊一葉殘雲無主

望海潮 次韻和子珍

黃昏庭院輕寒簾幙低花小几纖瓶冷玉鵝香焦寶鴨綿宵漏板無聲欄外
雨冥冥料爐灰和夢半零星珠箔飄燈照人心眼是疏櫺 無言爨銀箆
怕絃悽調促月暗花醒春事水流年光箭短禁他百樣飄零曲檻那時憑記
屨廊西畔立盡殘更不聽嘯鴉也應無睡到天明

霓裳中序第一

偶樵過縹子湖以此調賦蘋鄉情事婉麗可歌比由漢上促和則余將適南鄧西風遠浦白羽方涼身無搖落

如此秋聲撫絃低唱不自知其凄抑也

江頭黯送別隱約遙峰愁黛結飄落渚蓮似雪剩瘦鴈嗟花素波流葉殘紅
半澗是麝巾清淚凝血飄零恨小篷單燭屢照舊衾
遠道芳音未滅風流爭似小謝露下吹笙柳邊睇髮素蟾看又缺想湖上菱
歌也歌芳洲畔翠綃裙幅可似鴈雲裂

清平樂 極樂寺海棠花下作

柳花無力點上春衫碧幾曲迴廊閒佇立過盡蝶雙鴛隻
穠花一樹誰看
單衣小徑風寒消得玉人一凭新來只有闌干

蕙蘭芳引

紅淚一襟是湘水碎花零葉剩點點芳心吹上粉
似雪碧雞夢杳但倚竹
暗傷離別想夜寒月上舊事和誰同說 此日天涯飄零如我一樣淒絕且
微雨黃昏消受燭紅茗熟湘簾垂後蕙熏漸歇還怕聽花外數聲啼鴉

河傳 匡伯扇頭寫鏡湖一曲為題是解

花嶼烟浦雨初晴垂柳紅亭晚鶯苧蘿女兒鴉髻青採菱木蘭雙槳輕
鴨頭闌入花深處斜陽暮且傍鴛鴦住杏衫紅蓮葉東芙蓉一生烟雨中

江城子 秋水欲波菱花乍萼蘭舟容與芳緒渺然

藕花深處晚涼多鷓聲和柳邊過一角遙山輕點鏡中螺月下紅樓樓下水
人不見但聞歌 生衣着酒玉顏酡不尋他奈情何又道沅江烟水軟于羅
欲采蘋花將尺素難寄與託微波

金縷曲 闌干同愛師孺子

戶外青青柳倚東風迴廊幾曲斷魂時候細燕輕狸都不隔出字玲瓏嵌逗
消幾度玉羅衫袖一樹東頭白梨影熨春寒總在
前後同徙倚聽清漏
如今得似花時否繞銀牆輕紅一抹西風吹舊彙曲凝塵曾拍遍空認指痕
纖瘦甚響屨鄰家輕逗劃遍相思都無迹剩迴文不斷苔花繡明月底怕回
首

踏莎行 三月初五日宿彭善村夜雨寒甚曉起雪積寸許因賦

鴈不堪聞難遣無用五更風裏銀缸凍紙窗猶道月光明羅衾祇覺春寒重
玉樹朝新雕輪曉動馬嘶蹄碎瓊瑤銜江南已是牡丹時并門尚作梨花
夢

轉應曲

花徑花徑草色簾波相映闌干不奈情何曾凭春風袖羅羅袖羅袖淡月梨
花依舊

重午重午華屋薰風燕乳紅榴着色無多寫入秋雲扇羅羅扇羅扇好與謝
娘方便

張集馨 號椒雲江蘇儀徵人

摸魚兒 瀟池懷古

水流聲聲同聲鼓傾堤觸岸決漈重扶漢鼎迴炎祚銅馬赤眉紛攘河又廣

空莫笑雲房悲獨處西風深鎖廣寒宮此數詩置之溫岐集中幾不復辨
宜興蔣醉園先生 真介和易晚年官吾鄉學博口不言貧嘯歌自適詩筆
清婉記其中秋病起示眉姬云晚來扶我倚香篝試問今宵小飲不玉露滿
階涼似水十分明月五分秋天然好語未經人道又落花詩云便是開殘有
常例不教墮溷只飄茵詞旨溫厚得風人之意

都昌徐燮亭大令 灼綠波草堂詩八卷無題云酒闌嬌情抱琵琶茉莉新堆
兩鬢鴉消受香風在涼夜枕邊俱是助情花臉波紅暈罷徵歌髻雨鬢雲夢
自多鴛帳月來窗未掩艷情瞞不過嫦娥擬塞上凱歌云壁壘森嚴夜紀功
大旗風捲舞蛇龍氍廬痛飲燒椽燭一顆人頭酒一鍾繡鞍銀甲炫華裝絕
色胡姬捧玉觴馬後笙歌馬前鼓將軍還是少年郎此四詩足當驚才絕艷
之目

吳縣汪和卿先生 亮鈞官吾郡學博將五十年子姪多致通顯先生年逾八

十視聽不衰白鬚朱唇賞花賦詩猶有承平老輩風致往年於某校書粧閣見先生聯語云九九寒消藍尾酒年年春笑白頭人語極綿麗今年四月招李吟白先生及余輩餞春小集吟白先生呈詩云白髮門生稱一卮淡雲微雨牡丹時祇因坐上春風滿過却春光總不知先生卽席和韻云年年循例餞春卮春去春來未幾時慚愧平生太多事此心惟有落花知此不經意之作和厚清腴足以稱此老福

山陰陳孝蘭 咳客遊粵中感懷云中年氣味漸如秋西抹東塗悔浪游骨肉無多誰惜別才華有限不禁愁那堪面目憎羅隱漫說功名似馬周尙剩雄心消未盡星飛月落看吳鈎音調高朗瞻顧不凡領乙酉解首官縣令則已垂老矣

馮貞愍年七十四舉一子賦詩示章姬云充閩跨竈都訣我畫荻丸熊恐累卿詩意溫厚近聞有人刻其琴隱園詩詞未識此詩載入否

壬壬秋生先 圖運 詩云廿年和戰憂危議只與世人生富貴賈胡小豎那足謀一和一戰皆吾利愚謂昔之議和戰與後之談變法皆不出乎此先生此詩洵足喚醒夢夢湘綺樓集中圓明園七古一篇盛傳於時然其詩失之繁縛固不若此數語之精卓也

毗陵女史莊蓮佩名盤珠病起浪淘沙云夢斷小江樓宿雨初收鬧晴蜂蝶上簾鈎一院海棠春不管儂替花愁吟賞記前游轉眼都休風前扶病強擡頭知道明年人在否花替儂愁斷腸漱玉不能專美於前矣

吾邑陳女史軼其名年十四詠歌風臺詩云擊筑歌風韻最哀白雲終古傍高臺半生戎馬劍三尺滿目河山酒一杯父老渾忘天子貴英雄猶戀故鄉來弓藏鳥盡嗟何及想到韓彭惜將才詩筆雄渾出自閨媛猶難然詢之邑人鮮有知其名氏者

李吟白先生詩風華典贍情韻纏綿久推近代作手頃復見其庚子辛丑感

事諸作悲歌慷慨於世道人心煞有關繫並為錄之弔李海城督師云誰將
 血性報君親輦上羣公盡婦人羞與汪黃同誤國本來忠定是前身倉皇入
 衛本無兵不比苻離與富平浪說武侯疏將略可知穢史失公評褒忠一例
 拜恩施泰岱鴻毛信有之為問東窗秦繆醜偷生能得幾多時胡塵不掩寸
 衷丹大厦支憑一木難公自捐軀人媚虜疆臣幾輩有心肝衣冠親拜萬梅
 花自註公由揚州北上異代忠貞未足誇料得安陽原上樹枝枝終古向京華又詠史
 云乞和臣構媚金源五國誰鳴二帝冤一詔公然聲虜罪買絲我欲繡平原
 家祭無忘告太平放翁有淚泣神京後人莫議南園記畢竟開禧主用兵又
 題岳忠武印名拓本云不隨故國話滄桑累劫能增日月光一樣悅生傳宋
 印更無人話賈平章風鶴年來選將難誰從頑懦澈忠肝願摹萬本流傳遍
 遞與邊關統帥看近二十年此種議論寂然無聞蒙泉碩果之存即貞下起
 元之本異日氣運一變則先生此詩當與馴鐵小戒共垂不朽矣

往於友人齋中條幅見寶山邵心炯曾妓樓餞友金縷曲一闋情文雙絕
 歸卽錄稿存之篋笥頃見邵君遺集此詞獨不載蓋編集者未之見也詞云
 別酒紅如此可能堪并刀剪斷一襟芳思任是銷魂天不管涼月團團來矣
 照片刻團團羅綺翠玉雙聲歌一曲算今宵薄倖留無計只合受籠鸚鵡
 綰手贈香猶膩問蕭郎曾禁粉汗怎禁珠淚回首春風來時路兩處湘簾捲
 起便兩處醉肩爭倚何事珊鞭搖醉去芳樽別後將誰替替君把情絲繫
 同邑李丹叔明經恩綬博雅嗜古著冬心書屋詩集題顧亭林年譜後云斯
 人不愧王炎午自註潘邸上劉超宗書作炎午山東通志采先生文亦同說著滄桑便淚零布縷青鞋走
 天下十三陵上哭冬青燕京秋暮雜述云鳳簾北闕晴宵聳龍展西山右輔
 迴周武壯公祠云韋虎威名涵佛性應蛟水利寓邊才卽事云巨猾已成不
 羈馬大官俱是可憐蟲園居卽景云牽牛花放凍無語瘦竹一枝扶上牆懷
 吳瀚濤云可憐老作諸侯客頭白年年塞上笳全集篇什甚富以此數聯為

最上乘云

江鄉漁話終

韻藻詞

江都經半園先生撰

雄雉雌蜺鎮忽忽大地閻浮色本空雲淡紅牆虛碧漢花園明鏡刺烏銅回
文卅字三年病密記連環一縷絨說道橫陳同嚼蠟今生薄倖又釵叢
頗黎闌檻露華濃唱定風波忽懊儂入骨事常通寤寐斷腸花竟是芙蓉芳
顏脉脉窺金鴈銀漏迢迢咽玉龍隔水樓高難問訊他年無處覓臨邛
天台重到失仙厓閒看梳頭倚翠幃好夢此時難說醒小樓連日不開窗楊
枝遣去宜皈佛桃葉迎來恰渡江古押牙今非易覩他生奢願鵲雙雙
桃笙八尺展冰絲碧玉迴身睡醒時此境祇今常入夢可憐兩小竟無知梁
間燕子能傳恨懷內猶兒解亂碁剪取繡奩花樣紅蠅頭私寫十香詞
巫峽千尋接翠微小寒天氣雪霏霏桃花銷恨須千樹寶帶同心又一圍曾
託微詞憐宋玉漫憑行記詆楊妃天吳紫鳳渾閑事試與裁雲作舞衣

花間難遇六萌車，腸斷非關一紙書。定說合歡須種樹，倘能比目願爲魚。崔徽卷裏秋同瘦，甘后帷中玉不如。空記牧之詩句好，婷婷孌孌十三餘。瑟瑟天風動六銖，朝霞和雪與人殊。由來神女無非夢，從此羅敷自有夫。療我難求鞋上土，照卿願化帳中珠。手摹畫稿尋周昉，寫個華清出浴圖。蔣家小妹住青溪，高卷蝦須炙麝臍。舊聽清言霏玉屑，新書秘事搗銀泥。頻年文戰偏連北，如此眉痕定姓西。月不長圓雲易散，休論紙醉與金迷。春宵蹋月步銅街，病後蕭娘骨似柴。霧瑣丹梯雲母扇，霞裳金縷燕花牌。解圍待設青綾障，佞佛空施紫玉釵。稽首楞伽除妄想，三年修得八關齋。華筵回首紫雲迴，燕侶鶯儔怨鳩媒。愁絕香桃憐骨瘦，燒殘蓮炬驗心灰。東方易覓金燈草，溫嶠難留玉鏡臺。舟近仙山風引去，惱人無賴是蓬萊。彩灰和酒喚真真，鳳泊鸞飄感宿因。浪說玉簫期再世，偏云子晉是前身。金錢學易知先甲，繡簾攤書愛秘辛。慵翠悶紅無限意，一聲河滿孟才人。

吹花擘柳太紛紛，變體離騷賦雨雲。替挽香鬢分燕尾，強披纖指數螺紋。鴉頭金縷鴛鴦履，龍腦熏鑪翡翠裙。擬買西湖乾淨土，桃花種滿可兒墳。遙知楊柳是朱門，聞道明妃尚有村。簾外天桃分夢影，篋中紅豆寄啼痕。三生密約麻姑爪，一縷殘陽倩女魂。枉費紅綃頻覆手，書生無僕似崑崙。犀辟塵埃玉辟寒，世間無物比艱難。風吹鬢影琴心定，月照空梁帶眼寬。終日催歸憐謝豹，五絳糊口笑吳鸞。替人垂淚三條燭，鏡側紅棉未肯乾。玲瓏樓閣說仙山，貝闕珠宮亦等閑。春去風姨三面網，天邊月子兩頭彎。鴉髻覆額携鴛枕，鸞袖籠燈歛獸環。鴻爪雪泥留印在，梅花一笛試陽關。簪花格律浣花牋，小字銀鈎證可憐。鬢髻如雲河漢女，肌膚若雪藐姑仙。吹燈虔製黃昏散，鬪葉私分白打錢。成佛後須成眷屬，妙鬢領袖散花天。文窗窈窕閉雲翹，休向檀槽譜六么。薛荔秋深毛女洞，桃花春漲尾生橋。臂間兩兩金跳脫，頭上纖纖玉步搖。別夢依稀成往事，玉樓珠箔可憐宵。

小姑中婦各啾啾阿閣罌罌鳳巢銀合硃砂藏蜥蜴繡團翡翠驗鱗蛸鴛
衾解夢愁眉展皎帕裁詩豔體教二十四橋人在否好求海上續絃膠
破鏡飛來賦大刀等閑黃鳥啄含桃一壺紅玉靈芸淚七尺珊瑚石尉豪願
化爲雲離楚岫倘鶴解珮趁湘臯折花傷手花應笑容易安仁有二毛
蘭膏閃閃卷銅荷小婢金刀贈紫駝天女道場方丈室書生家具一籠鵝背
人遍試蕤蕤鑱教培微聞捉搦歌三載登徒空望眼怨他鄰子未投梭
釵挂臣冠帽拂花竹枝鹽汁引羊車吞針自古惟羅什娶婦何人得麗華象
簞翠鋪懷夢草犀刀紅剖鎖心瓜侯門咫尺深於海啼笑從他玉辟邪
邯鄲挾瑟舊名倡並蒂芙蓉繡繡繡葦沈烟銀鴨煖櫻桃消暑玉魚涼小
蠻掌上腰盈尺素女圖中態萬方玳帽爲簪椒聖壁盧家曾有鬱金堂
曾聞太上始忘情絃管排愁白石生合德藏春連桂苑曼卿小謫王蓉城紅
鉛一粒長生藥玉椀千絲不乃羹何用浪傳三少訣黃金鑄像禮錢鏗

習靜閑觀五木經嘗聞鼓瑟有湘靈朱絲待繫紅襟燕玉箸初臨屈膝屏知
已舊憐花拂面選聲今怕雨零鈴黃絃剪得貪修道會釀天邊薄命星
被池桃浪結紅冰病裏經秋弱不勝漫指小詞疑永叔枉持神咒笑摩登長
眉愁漫菱花鏡半臂寒添柿蒂綾生是一雙同命鳥未勞蛟蜃化韓憑
鑄成錯字也風流頑鐵何須聚六洲雲外東南飛孔雀水邊西北有高樓花
奴羯鼓龜茲樂燈婢歡筵嬾婦油龍女幻羊尤幻極便宜柳毅寄書郵
綠楊門巷靜愔愔山上山聞說蕤砧聶隱成仙終是俠劉楨平視却無心腰
間雜彌龍蟠玉鬢次雕釵鳥吐金欲覓靈龜傳夢去通誠一曲倩青琴
一生頂禮百花龕好色從來說慧男囉噴歌聲偏易解風流禪味最難參調
羹每惜瑠瑤七倚枕慵抽玳帽簪桂子成塵香不滅生憎雞舌小櫻含
仙衣繡領九花檐絃索琤瑯刮骨鹽列子御風疑化蝶常娥奔月待成蟾金
瓶夜引胭脂井銀蒜春垂翡翠簾細認中庭蓮印在勝他小字篆紅鈴

蟾蜍斜隱杏紅衫精衛朝朝石枉啣玉女投壺偏一笑金人有口定三緘屬
郎乘馬憐蘇小追婢騎驢鄙阮咸願得縫裳惹樣手他年采藥共長鑿
桃花人面此門中酌醉斟愁賦比紅半夜雪闌期射鳥一生花底活秦宮芳
蘭葉葉香中祖胡蝶雙雙夢裏蟲方寸火煎無說處天邊望斷美人虹
盤鏤錦字貼酥胸聞道巫山六六峯白紵新聲教宛轉紅窗舊夢記惺忪香
熏繡被龍涎膩淚滴金疊虎魄濃向晚簾櫳春寂寂餘花畢竟爲誰容
紫烟樓閣掩螺窗閣內何來吠客庖有限蠶絲抽乙乙無端鳳鷲也雙雙願
爲楊柳長遮戶若采芙蓉定涉江細綴玉蟲如欲語並頭花蕊又金釭
小樓紅近影娥池一斛真珠寄所思荳蔻試香添麝注櫻桃漬酒溼燕支婦
人在薄朱翁子廝養潛通衛少兒香火情緣留得否生生巫祝水仙祠
多情姊妹哀光威笞鳳鞭鸞是也非盤薦五辛徵吉語符書六甲誦靈飛眉
痕窺處長浮翠骰子呼來戲點絳解道情郎無價寶慧中秀外讓元機

徐澹廬 詩筆豪邁逼近太白白雲泉云四山黯無語一峰撐江天老龍扶
雲氣百釀爲清泉泉激攫雲起泉寂抱雲眠雲泉兩不知渾然三千年海天
樓云萬象徒紛紛一樓此鎮嶽風色數百里至此歸一束生割蓬萊股橫插
滄溟腹日落潮頭回百靈時起伏坐弄蒼玉笛一簇海雲綠讀范无錯朱曼
君邱履平三人詩集云三百餘年局興亡不敢論青衫王伯穀白髮杜茶村
駿馬千金骨文章六代魂梁園零落甚賓客幾人存贈顧公云鰲倒鵬飛氣
不春眼中滄海正揚塵年來憂國憐同病歸已無家尙惜身一劍倚空孤月
黯危峯突路衆山曠樽前不敢論懷抱豎子功名事事新他如鐘聲涼度水
雲氣暗移山何來一斛東風酒澆我崢嶸鐵肺肝亦復未經人道
漢陽詩僧名侶梅性好梅花有句云供養梅花三百樹一花一葉一蒼生殊
有饑溺斯民之意僧能如此可以借慈航濟世矣碎句如雲隨衰葉墮風曳
斷鐘來路古苔生磴村貧竹有花能得清閒卽是佛未忘嗜尙且吟詩皆清

妙或曰僧本貴家子以廕得官少年喜揮霍接交豪士蕩產後薙髮爲僧葺梅庵而居之師號古梅畜一雞僧名稚梅俱粗解詩私鐫梅花知己小印自名曰三百梅花屋主峭拔絕俗若世人無一可與語者余作當世三隱君子詩聯爲同志而侶梅居其一倘亦異乎他人之取友與

望江何亦民俊由庶常改官水部出守桂林善政嘖嘖人口有夢約軒稿詩才清逸如題姚抱勤大令虹橋送別圖云織錦紛紛擅術工羣生憂樂幾人同古今一副循良淚祇在哀鴻大澤中豈弟之隱情見乎詞過洞庭云乘風湖上渡駭浪帶雲奔但見蒼茫色無分天水痕滄江歸吐納紅日浴朝昏三載重來往波平適夢魂亦雄壯稱題在郡喜麥熟云二十六城烟火稠使車頻爲省風留天蘇赤子三春雨人刈黃雲四月秋鄭國萑苻邊境靜周京俎豆上庠脩綠陰滿地兒童喜猶聽風前擊壤謳想見俗洽時和承平氣象其他警句如家貧難遠別親老逐微名寥落天涯賓主信清寒時節弟兄親訓

辭深厚洵爲閱歷有得之言

詩有拗句極其自然者膠州柯敬輿勳有句云山鬼夜共老蛟語怪禽時作嬰兒囁王苑丞祖有句云梅花半樹鶴尋月燈火一簾人讀書皆妙高要黃琴山太守德有溪中一首極佳溪中煙雨半模糊溪上烟嵐如畫圖三里五里水楊柳一聲兩聲山鷓鴣偶然得句有時有隨便看雲無處無眼前好景說不出喚起阿章爲我摹

琴山早起山行絕句云嫩雲籠日薄于紗細艸蒙茸一徑斜好是畫眉聲不斷滿山開遍白桐花風趣絕佳余酷愛誦之

近日南省多詩人當風雅星墜之會猶復唱和無已是政學家于此道以餽羊芻狗視之若不甚愛惜而愛惜轉出自朝吟暮啣之流得以存一髮于不絕致足重也番禺沈太侔禮部宗于京師創著澹詩社南人以詩稿寄者源源而來積久益多太侔懼歸灰滅屬余摘拾佳什警句一一錄之如聚首

一堂時有吹竹彈絲之樂亦消遣之一法也韓偓瑞冬日曉行流名橋云
 大野人無迹荒村烟半籠溪寒波斂白霜老樹流紅客路蒼茫裏詩心感慨
 中田翁閉門坐羔酒醉朦朧邀同人小飲云一幅倪迂畫蕭疏澹墨痕夕陽
 山外路黃葉水邊村秋色老蘆荻豪情寄酒樽故人先踐約明月正當門陳
 若木崇光題溪山雨霽圖云羣山各新靚眾樹喜初沐雲意猶濛濛林端上
 朝旭溝水洶洶鳴既雨無不足起訪山中人相將整葺屋胡菘甫翰病中示
 弟云汝年十四病醫差阿母相憐夜績麻績到四更呼汝醒壺中蓮子正開
 花王小汀葵雨窗排悶云蒙茸階下石明鮮薄暖輕寒二月天滿徑苔痕連
 草色一簾香篆泝茶烟不聞鶯囀當春半苦恨羊裘戀晚年老我病絲兼藥
 裹幾回叅破在家禪佳日將逢百五辰那堪陰晦動連旬老聞絲竹徒增感
 貧度鶯花不當春安得和風舒倦眼空教積雨困閒身興來欲蠟尋芳屐擬
 向平山逐軟塵顧子詹牧與張吟珊云江東寒雨正瀟瀟萼菜秋風太寂寥

故國烟花吟不得夕陽無語過虹橋題宮小娉畫蘭摺扇云明月上闌干亭
 亭碧玉寒秋風來扇底愁絕馬湘蘭鄭芸衫長吉秋夜云庭院無人夜氣清
 井梧初落早涼生秋風秋雨秋心碎不獨芭蕉葉上聲送徐子後之海上云
 殘日隱瓜州飛濤挾怒流我携一鐵笛吹送大江頭君抱銅琶去高歌海國
 秋他鄉非故里莫更久淹留陳逸耘念東游蜀山云入曉渡東沈天風吹夢
 回雨餘初日薄帆對萬山開轉折沿谿曲青蒼到酒盃東坡有別墅何處問
 亭臺馬伯梁蔭泰大風渡江云五夜歸心急鳥翎布帆斜曳雨溟溟掀騰雪
 浪排空立栗烈寒飈倚醉聽瓜步城湮衰艸白南徐山遠暝煙青推篷漸識
 邗關近回首波濤隔渺冥和王小汀韵云駐雨芳園霽景鮮櫻枝紅綻薄寒
 天慵疏未信防生計愁思無端入暝烟裘有鸛鷗歸鴈候硯懷鸚鵡學書年
 多慚鏡裡形斑白日誦南華抵悟禪蕭味之炳華再過篤山云歲晚得相見
 此行何日歸一牕燈影瘦千里雪花肥河北多名士淮南一布衣故鄉明月

好揮手暫相違過煬帝墓云茅屋全爲碧樹遮石橋西畔見人家阿婆畢竟
風流甚開遍雷塘十里花陳維之延祺冬夜云夜坐不覺久霜街已斷更月
殘還弄影風過尙留聲歲月驅年齒飢寒鍊老成依劉何限感撫劍憶平生
吳夢蘭仲送徐二川之湘江云孤艇下甯鄉湖亭新酒香春潮一枝檣搖夢
度清湘明月且回首東風還斷腸前灣三十六莫忘此壺觴題凌棠蓀廣文
龍津垂釣圖云得此山川抵壯游高懷不厭滯雄州已知時世無長計欲挽
乾坤入釣舟百歲那堪銷似燭一官何幸冷于秋試看自古英雄事多半龍
津津水流童雨秋開秋日登望海樓懷施二云戍樓笳鼓入秋哀客思如雲
撥不開江上亂山連瘴合海東一水抱城來爭棲薄暝鴉喧樹覓食荒原鳥
啄苔惆悵天涯知己在白雲不見尺書回沈則沈紹李古意云昨過長安道
香塵拂華轂城南老樹林中有吾家屋大道倡家樓宵深秉華燭誰家新嫁
娘燈掩紗窗綠黃少白瑞蓮雜感云舌以柔而存齒以剛而折謂柔能克剛

世人喜此說所以巽懦夫頽然寡氣節丈夫不自強如婦取容悅那知俠烈
場往來多豪傑腰懸寶劍鳴手擊唾壺缺將軍頭顱輕壯士目眦裂取義能
成仁慷慨灑熱血浩然塞天地凜乎傲霜雪王潛剛太原云咸池朝日海雲
昏虎嘯龍吟入太原西極關河含御氣南中草木動離魂千山葉落旌旗出
十道烽傳節鼓尊遙望終南青翠滿野芹何日獻堯門警句如孫次青奇云
江山戰血飛三尺風雨悲歌惜寸陰驚回醉夢日將夕遠盼鄉關山亂橫胡
无悶云征鴻午夜飛清渚旅燕秋風感故巢江關得句攜懷古人海藏名且
待時姚采芝家煥云側身宇宙時何補際會風雲興已闌登閣又看雲上峽
過江空憶月當篷翟楚材賦云四野濕雲爭擁樹一彎新漲欲平橋戴浴梅
敬輿云奇花細引山妻認僻徑閒同穉子猜張心蕪長云一寸客心飛柳外
二分明月捲簾時一劍一琴隨我老半詩半酒遣愁多王苑丞祖翰云學習
全荒書宿蠹恩讐已定劍成龍戴惺吾述經云無能無好客歸去秋雨秋風

天奈何琴壁無風絃自語酒瓢潑硯墨難濃樹葉半疏經旱蠹艸梢微顛立
 流螢霜明野屋見微火雨積山廚盤硬煙殷豫亭梯雲云籬邊人比黃花瘦
 夢裏寒驚白露適半面妝成應識我一池水皺又干卿徐澹廬望云一年新
 舊爭存夜萬戶風烟特地寒童雨秋云青衫賭酒前年夢紅袖燒燈何處樓
 微雨易迷煙外路輕雷難醒夢中人陳荇舫堂云歷盡交遊知冷暖病深筋
 骨識陰晴鍾左三槐云久知入世無良策幾見虛心到布衣鍊我性情窮亦
 得累人口腹事終譌皆琅琅可誦之句又謝春柳璋深情轉近癡蕭味之寒
 瘦不關詩二句亦妙

徐澹廬有哀杭州秋女士句云熱心不肯如灰死卿亦西方瑪利儂以西例
 中持論平允又有署糸燕者有句云對棋弱息年猶穉推刃蛾眉事可知亦
 語有含蓄胡蘊山文輝集文選句誄女士亦工緻未能具錄為憾

蘊山工於集古性豪放不羈曾作濯足萬里流圖以自況其襟抱可想紀其

花冷么禽語春怨 玉容遠也應憐杜郎落拓悲錦瑟弦柱暗驚淚染宛轉
 碧淞湖共垂楊紫恨難翦鳳紙題殘奈雲邊珠珮聲斷判塵銷鬢綠萬一跨
 鸞相見水龍吟云雪中過了花朝憑誰問訊春來未斜陽歛盡層陰慘結暮
 笳聲裏九十韶光無端輕付玉龍遊戲向危闌獨立綈袍冰透休道是傷春
 淚 聞說東皇瘦損算春人也應憔悴凍雲休捲晚來怕見攬槍東指嘶騎
 還驕棲雅難穩白茫茫地正酒香羔熟玉關消息說將軍醉壽樓春云嗟春
 來何遲恰芳塵散麴烟渚流漸此際飄零詞客倦游何依悲搵惹愁牽離似
 左徒行吟江涯恁錦瑟華年青山故國回首夢都迷 登臨地芳菲時幾紅
 牙按拍白袷尋詩底事尊前雙淚者回難持埋香恨今誰知剩短碑淒涼題
 辭更不縮春愁垂楊過籬三兩枝香塚在陶然亭西北小阜上碑陰題云浩
浩劫茫茫月短歌終明月缺鬱鬱佳城中
有碧血碧亦有時盡血亦有時滅一縷烟痕無斷絕是耶非耶化為胡蝶又
詩云鸞零風雨可憐生芳草迷離綠滿汀開盡天桃又覆李不堪重讀瘞花
 銘三株媚云啼鶻聲自苦卻紅樓依然玉容歌舞百計留春恁道愁還仗酒

邊詞句燕燕鶯鶯休更惜天涯花絮此恨能消除是西山翠鬢終古 芳草
盈盈隨步恰一碧無情夢中鄉路斷送韶光莫畫闌真在更無人處廿四番
風回首憶非花非霧一霎城笳吹出明妃舊譜燭影搖紅云簾暮誰家紙鳶
風急餘寒峭選樓西畔綠楊枝才見晴絲裊十里簫聲未了暗驚心文園易
老酒帘低處極目烟蕪古城斜照 詩鬢天涯倦游情味傷春早故人門巷
玉驄嘶回首長安道襟袖塵香自繞待歸來梅花一笑二分明月夢裏揚州
不須驚覺去歲沈子封提學游江南歸嘗以葵生近著筆記五種見詒談藝
為多間資考證所著香海棠館詞話則廖寥短章恨其易盡也

番禺葉蘭臺先生衍嘗選已作秋夢庵詞與沈伯眉丈世楞華室詞汪
芙生丈瑒隨山館詞合刻曰粵東三家詞先生早歲綺才有葉鴛鴦之目賦其
鴛鴦詩云笑我夢寒猶待闕有人情重不言仙有柳翁者以翰林改官戶部
見之說曰有才如此尚作不知何處月明多耶以女妻之以翰林改官戶部
倬直樞密解組以後主講越華書院十年余與姚伯懷潘蘭史皆從問字後

堂絲竹至今猶繞夢寐乙未余計偕北上先生手書文章有神交有道珍珠
無價玉無瑕十四字楹帖見詒又為賦慶春澤慢詞以寵其行詞云珠儼紅

十年秋夢初醒唱出東風何人共書游亭銀河淨滋生花筆敲池波底事干
卿話纏綿處恨桐卷芳思蘭馨 楞華豔散霜芙蓉悵覓裝舊詠法曲凋零
海上琴音更無孤鶴潛聽白雲只在山中住訴 余藏新莽始建國二年鏡先
哀絃喚起湘靈泛仙槎杏苑尋芳歌編瑤京

生為賦百字令詞云硬黃輕展認當年偷照長安宮掖剛卯銅符零落書題

堂羞盡巾幘 知否原碧新妝眉黛乍啓對影窺蓮頰堪笑迴旋隨斗柄映
到漸盡宜室壁 彩菱生苦花繡漬位置泉刀側漳河遺瓦勝他猶伴吟席
零縑斷墨尙藏篋笥先生晚年病黃嘗賦七律四首句句皆暗嵌黃字亦可
想其風趣也

秋夢庵詞刻意夢窗而得玉田之神水龍吟云銀蟾何處飛來碧空捲得炎
風淨樓臺一抹是烟是水鎔成清景道冷呼鸞天高唳鶴露淒風警料廣寒
今夕素娥無睡晶簾外羞孤影 我欲凌虛絕頂洗塵襟玉壺冰鏡穠花錦
石漢家遺恨那堪重省惆悵江南有人歸夢相思愁證試憑闌長嘯橫吹紫

竹喚啼鳥醒清平樂云蟾光似水花影層闌碎風露羅衣涼欲洗此際高樓
誰倚 鄰家絃管分明兒家庭院凄清只有一枝橫竹奈他都是秋聲瑤花
云纖雲淨洗萬里涵輝瓊宇都澄澈花魂初醒簾乍卷冷浸一庭涼雪塵襟
盡滌渾不覺天風飄瞥歎素娥依舊團圓明鏡幾曾傷缺 高吟拍徧闌干
問法曲霓裳今向誰說河山無恙還憶否當日廣寒宮闕危樓獨倚聽鶴背
瑤笙清絕瞰秋江喚起魚龍橫竹數聲吹裂瑞鶴仙云海棠嬌欲語正紅濕
屏山花光如許流鶯尙啼樹怪無端吹上二分塵土飄殘錦絮怎飄得愁絲
恨縷怕呢喃雙燕歸來不是畫梁朱戶 何處枇杷門巷鸚鵡籠舊游都
阻尋芳伴侶誰共賦傷心句縱春風詞筆吟成荳蔻莫寫天涯倦旅倚高樓
目斷斜陽一襟淚兩解連環云冶魂銷盡恨紅樓鎖恨殢春無影渾不記綺
夢歡塵有宵語翠篝曉妝鸞鏡幾度清歌便換了樽前芳訊剩湘簾一桁麝
粉香殘鴨篆烟冷 秋懷頓成薄倖歎情隨月蝕人替花病灑別淚猶漬青

衫縱鴛軫重調鳳簫慵整玉砌苔窩尙留得鞦韆織印料飄蓬瘦蛾蹙損畫
闌獨凭子夜歌云遡歡塵錦屏絳蠟花月豔情如許有多少琴心箏怨付與
紅牙金縷徑窄埋鴛樓空鎖燕窩換淒涼處剩長廊鸚鵡迎人似說華鬢影
事夢尋無據 雕闌畔逡巡繞徧冷落一庭秋雨禿柳當門橫籬礙路莫繫
游驄住恨樊川薄倖天涯空歎羈旅翠袖籠箋青衫浣淚漫憶銷魂句祇十
年幽恨難忘酒邊淒語

花影吹笙詞爲蘭臺先生尊人蓮裳英華所作後附小游仙詞一百首讀者
如聽鈞天廣樂也詞凡二卷皆搜輯於兵火之餘馨逸自成南宋遺則臨江
仙云花事暗隨春事了魂銷風雨年年無聊情緒奈何天間愁邀燕子軟語
話纏絲 綠寫相思紅寫怨淒涼知情誰憐傷心人月兩嬋娟分明清影在
都欠一分圓湘月云冷冥冥地撥爐香靜坐悄無情緒一院苔花凝暗綠淺
沁二分疏雨蓮漏微沈桃笙倦疊嬾賦傷心句西風簾卷可憐人瘦如許

爲問怨月啼蜚干卿甚事直恁聲酸楚露濕閒階孤葉墜響亂夜深砧杵碎
翦窗烟團圓燈影都是愁來處紅樓夢穩秋心知對誰語蝶戀花云月轉桐
陰風碎竹庭院烟深瘦影寒圍燭翠被香銷蓮漏促羅幃倦倚人如玉 明
鏡無塵釵夢熟夢醒雲飛雲斷痕難續波冷露零秋瑟縮芙蓉紅淡鴛鴦綠
一翦梅云層闌殘照寫黃昏界破簾痕劃記釵痕月中愁影鏡中人圓欠三
分瘦減三分 慵妝倦倚兩鬢雲紅麝香薰紫麝花熏心癡拚付蝶溫存情
暖於春夢懶於春吳縣潘文勳序之謂當其哀樂所流纏緜靡極亦自有不
得已之故在也

小三吾亭詞話卷一畢

自停當無人訴與孤孤寂寂有天原諒

咳天色昏了沒奈何只得仍上樓去罷（行指介）你看那班鄰家姊妹都因丈夫
出征各自婚嫁好沒道理奴是秦伯之裔守周公之禮把夫妻兩個字看得重大一
萬年不講自由的石兒石兒可知奴是箇頑固人兒要與你長此終古喲

（尾聲）一尊頑石長無恙話對着殘燈樓上則盼那旅夢歸來和他慢慢的
講（下）

化石 第四齣

（場上設衾帳且暗上睡介）（生披血巾帶箭鬼魂上）

（越調引子）（霜天曉角）家園重見往事都更變苦憶當年人面西樓隔斷寒
烟

馬革埋沙骨已枯維新振武効前驅誰憐關塞魂歸夕一點星星鬼火孤我富山重
保自從折散夫妻來作征解軍士光陰迅速一瞬二年屢戰成功博得部營微職滿

擬惡氛蕩淨振凱還鄉與俺娘子重話經年離別歸期已定不料收場出仗竟被敵兵誘困死在鎗林礮雨之中（悲介）天哪生為離別之人死作陣亡之鬼這般結局好沒來由幸得天神憐念微忠給發路引令游魂無拘無礙重返鄉園一路順着風兒行來不覺已是鎌倉鶴岡地面（指介）看櫻樓那邊一座僵石獨立如故兀的不是俺那娘子獨住裡面麼（閃入樓介）（旦作夢語驚介）（生）娘子我回來了（越調過曲）（小桃紅）趁這會亂星微月半昏天一步步禁不住心頭顫也只見那短檠燈畔兀自有舊釵鈿（前行又退後介）纔一轉又難前多管是輕魂不耐風旋娘子你只待一瞬兒同歡忭也却不道路隔重泉看俺血模糊已化了鬼煩冤

（內打更鼓生驚介）娘子嘎俺死得好慘哪那一日呵

（下山虎）愁雲一片萬骨坑填血雨如花濺遊魂萬千無處逃生飛刀亂箭苦嘎俺委葬黃沙何處邊沒人來傳魚鴈沒人來化紙錢斷送蓬蒿裏殘

屍自憐原不是芳草萋萋人醉眠

咳俺既是為國而死得分明到也無悔娘子只可憐你被俺閃的苦也

（五韻美）記當日向妝樓殷殷餞歸期約在天早晚怎知道這杯酒教你向夜臺奠歸魂重顯怕睡眠朦朧難辨（內五更鷄鳴風起生驚介）風聲緊鷄亂喧娘子娘子俺與你地老天荒甚時重見

（生魂閃下）（旦哭驚醒起坐介）

（哭相思）悠悠生死別經年魂魄今宵來入夢

呀好一陣血腥也這場惡夢奴的五郎敢是凶多吉少呢（大哭介）

（五般宜）盼只盼俺夫妻今生再圓望夫山眼兒望穿那知他一命喪幽泉看腥風慘霧斷雲飄電一霎裡魂靈活現（搓眼介）睡沉沉淚眼（沉吟介）只怕是心裡暗胡猜夢魂兒把人騙

咳奴家今番這夢非同小可仔細想來他那模樣是血甲滿身帶着一枝斷箭還向

奴說許多訣別的話竟是已死無疑了五郎五郎你既從此永訣妾的一身也只得前路相隨啣

（山麻楮）生共死休留戀拚作箇泉下相逢兩地牽連情願奴苦惱說不盡千千萬萬止了得一生別緒一場噩夢一段癡緣

奴家立志已決死在須臾不免學那梁綠珠墮樓身殞即去與五郎相見罷（到樓口作跳勢復轉介）且慢前面一座頑石是與五郎憑他拜別的今日我愛哥與五郎雖非死在一塊兒也要與他拜別一番顯得奴的石心與他的石心是一日百年永遠不能回轉的啣（作下樓到石前介）石呵

（蠻牌令）你頑固不能言俺望遠淚漣漣夫妻離兩地頃刻便團圓

（拜石介）奴與你剖心兒一樣剛堅天難補海莫填請就此受奴一拜別酒離筵（起立復坐石上介）（內作風兩雷聲介）（旦）呀才得天明早是淒風苦雨天哪我愛哥特來赴死便是山崩海立也是不怕的這風雨雷電有甚打緊呀

山左歷城吳兩軒比部爲十五謎家之一所出謎專尙作工耐人尋味嘗嗣奕臣編修丙子二甲第一人簪香編修庚辰春闈第一人兩軒復以傅子者傳賢癸未殿試陳冠生冕又大魁多士丁卯戊辰間與陳壽田太守韓蓀農學正段可亭州倅在五斗齋合燈出謎兩軒有一枝斑管界棋枰一條隱字一簫字極有趣爲鄭芝泉給諫揭去

蓀農學正以優貢舉乙亥秋闈工書善繪花卉兼工鐵筆乙亥三月在趕驢市聞喜館出謎兩夜揭得者贈以畫幅圖章有今也則亡一條隱唐詩人間能得幾回聞頗爲黃公度都轉所賞憶庚午燈節蓀農寓楊梅竹斜街余曾與合燈出謎有阮籍報應一條隱唐詩途窮反遭俗眼白生斯世也爲斯世也善斯可矣一條隱韓文愿之言俱爲田東方揭去又車馬輕裘一條隱字一黃字爲四川黃子幹農部揭去以姓黃人來揭黃字謎亦奇矣

趙鳳瞻在薛家灣某家揭一條步亦步趨亦趨隱字一趙字以天水姓人揭

天水字謎妙極如黃子幹之揭黃字也

花翎之製始於本朝有五眼三眼雙眼單眼之別以雙眼花翎四字作謎面
隱項羽亦重瞳子六字可謂巧極高文良公味和堂詩集中有冠飄雀翠天
風細之句即詠花翎也

大興李心泉侍御謎不多見而條極諛諧有和尚模頭打算盤一條隱京諺
按著葫蘆搵子聞為者之大笑心泉丙午副車由部曹擢侍御書法學趙集
賢小屏行書尤佳

寶坻李滋園大司空齒昆季五人皆擢第時有五子登科之目在奈家胡同
寓宅出謎相傳一條我固疑是老奴今果然矣隱唐詩太真含笑入簾來

唐時有令女子以手掬酒飲者謂之白玉蓮花盞近復有以蓮瓣作杯者謂
之鞋杯余用鞋杯二字作面隱唐詩隔座送鉤春酒煖李小川侍御揭去蓮
花盞見北夢瑣言

琉璃廠為金石總匯所而地近囂塵屠沽雜處有某書坊出謎街巷小兒喧
鬧燈下擁擠爭罵幾至揮拳主人出為解紛隨即補謎一條猜謎本為風雅
事隱畫書一句識者知其以不宜動土譏也相與哄堂按京諺以鬪毆者為
動土

里巷歌謠有所謂一等也不來二等也不來者大約邱中有李侯我城隅之
類大興包楚岩作謎學台下馬只有新生三四赴考隱一等也不來二等也
不來有某太史者素倜儻且工時曲一見此條隨唱時調以揭之同在燈下
者為之哄堂或云楚岩原作
面係過羅二字

成裏成面最易與前人合掌故馮鏡齋蔡星階諸人專尚作面有造史鑑面
而極似真者如羣臣請上尊號弗願也隱公綽之不欲帝自往迎之羣臣無
諫沮者上逆而下順也此人欲效公孫均也隱學則三代共之皆渾成有
意趣

段可亭有一謎主人脾氣直粗暴拿著家人當氣毬隱六才小的提起來將
脚尖撞猜者無不胡盧因憶唐詩有信道陽春真有脚因風踢上樹梢頭之
句蓋詠木本繡毬也與此謎俱堪捧腹

兩樓隱語昭考以臣爲友隱宋人王十朋不如余所揭天津孟小帆孝廉一
條以二月二隱王十朋較變化

俞禹門以孝廉官大令金漱川茂才傳其一條咬舌人說黃白物隱詩經經
之營之與余作晉人說黃白物一條心思暗合

臣密言作裏陳子翔以避人焚諫草扣之施小峰以封奏扣之此面異而裏
同者也使君子作面胡棣華以之隱書經命公後余則以之隱書經星有好
風此面同而裏異者也

京中銀價糧價長落不時順天府月奏一次所以惠商者至矣田東方有市
上一天一行市一條隱六才鎮日價

